



## **O D L U K A**

### **O USLOVIMA I POSTUPKU ZA IZDAVANJE I ODUZIMANJE SAGLASNOSTI LIZING DRUŠTVU**

#### **I. OPĆE ODREDBE**

##### **Član 1.**

Ovom odlukom se propisuju opći uslovi i rokovi za:

- izdavanje saglasnosti za sticanje ili povećanje značajnog vlasničkog interesa u lizing društvu, sticanje vlasničkog interesa lizing društva u drugom pravnom licu, osnivanje podružnica i izbor vanjskog revizora;
- odbijanje zahtjeva za izdavanje navedenih saglasnosti i
- oduzimanje izdatih saglasnosti.

#### **II. PRETHODNA SAGLASNOST ZA STICANJE ILI POVEĆANJE ZNAČAJNOG VLASNIČKOG INTERESA U LIZING DRUŠTVU**

##### **Član 2.**

Fizičko ili pravno lice uz zahtjev za izdavanje prethodne saglasnosti za sticanje ili povećanje značajnog vlasničkog interesa u lizing društvu preko 10%, 20%, 33% ili 50% kapitala lizing društva, Agenciji za bankarstvo Federacije BiH (u daljnjem tekstu: FBA) dostavlja:

1. pravna lica - sudsku registraciju; fizička lica - kopiju lične karte ili pasoša;
2. pravna lica - podatke o poslovanju u posljednje tri poslovne godine (bilanse stanja i uspjeha revidirane od strane eksternog revizora) kao i posljednji periodični izvještaj; fizička lica - potvrdu o plaćenom iznosu poreza na prihod;
3. podatke o načinu sticanja ili povećanja značajnog vlasničkog interesa;
4. akt regulatorne, odnosno nadležne institucije kojim se dozvoljava namjeravano stjecanje ako se radi o stranom pravnom, odnosno fizičkom licu;
5. izjavu o vlasništvu u drugim pravnim licima;
6. izjavu o zaduženjima kod drugih banaka i njihovu visinu.

##### **Član 3.**

- (1) Akti koji se dostavljaju uz zahtjev iz člana 2. ove odluke moraju biti u originalu ili ovjerenoj fotokopiji.
- (2) Ako se dostavlja akt na stranom jeziku, uz isti se dostavlja i njegov službeno ovjereni prijevod na jednom od jezika u službenoj upotrebi u Federaciji BiH.

##### **Član 4.**

FBA može odbiti zahtjev za izdavanje prethodne saglasnosti za sticanje ili povećanje značajnog vlasničkog interesa u lizing društvu iz sljedećih razloga:

1. lošeg finansijskog stanja podnosioca zahtjeva;

2. ako je podnositelj zahtjeva dostavio informacije koje su netačne ili nisu u skladu sa propisima FBA ili je podnositelj zahtjeva odbio da dostavi podatke koje je FBA tražila radi odlučivanja po zahtjevu.

#### Član 5.

Rješenje po zahtjevu za izdavanje prethodne saglasnosti iz člana 2. ove odluke, FBA će donijeti u roku od 30 dana od dana prijema potpunog zahtjeva.

#### Član 6.

Lizing društvo je dužno FBA dostaviti ovjerenu fotokopiju upisa/izvoda kod nadležnih organa iz koje je vidljivo sticanje ili povećanje značajnog vlasničkog interesa, u roku od 15 dana od dana upisa/evidentiranja.

#### Član 7.

FBA će oduzeti izdatu saglasnost ako lice u roku od šest mjeseci od dana izdavanja saglasnosti za sticanje ili povećanje značajnog vlasničkog interesa ne stekne ili ne poveća poslovni udjel ili dionice na koje se saglasnost odnosi.

### III. PRETHODNA SAGLASNOST ZA STICANJE VLASNIČKOG INTERESA U DRUGOM PRAVNOM LICU

#### Član 8.

(1) Lizing društvo uz zahtjev za izdavanje prethodne saglasnosti za sticanje vlasničkog interesa u drugom (postojećem) pravnom licu, koji prelazi 5% do najviše 25% njegovog osnovnog kapitala, FBA dostavlja:

1. prijedlog odluke nadležnog organa lizing društva za sticanje (ili povećanje) vlasničkog interesa, sudsku registraciju pravnog lica u kojem stiče (ili povećava) vlasnički interes;
2. finansijske pokazatelje za pravno lice iz tač. 1. ovog člana, za posljednje tri poslovne godine (bilansi stanja i uspjeha revidirane od strane eksternog revizora);
3. podatke o ukupnim vlasničkim interesima koje lizing društvo ima u drugim pravnim licima, te analizu pokazatelja kako će se ulaganje odraziti na poziciju neto kapitala lizing društva i ostalih zakonom propisanih standarda poslovanja.

(2) U slučaju da lizing društvo učestvuje u osnivanju ili samostalno osniva novo pravno lice, uz zahtjev za izdavanje prethodne saglasnosti za sticanje vlasničkog interesa u tom pravnom licu, koji prelazi 5% do najviše 25% njegovog osnovnog kapitala, FBA dostavlja:

1. prijedlog odluke nadležnog organa lizing društva za osnivanje novog pravnog lica;
2. osnivački akt koji sadrži sve elemente u skladu sa Zakonom o privrednim društvima;
3. učešće (nominalno i procentualno) lizing društva u novom pravnom licu;
4. druge akte po zahtjevu FBA.

#### Član 9.

FBA može odbiti zahtjev lizing društvu za izdavanje prethodne saglasnosti za sticanje vlasničkog interesa u drugom pravnom licu iz sljedećih razloga:

1. lošeg finansijskog stanja lizing društva;
2. lošeg finansijskog stanja pravnog lica u kojem lizing društvo namjerava steći vlasnički interes;
3. ako su ukupni vlasnički interesi koje lizing društvo ima u drugim pravnim licima prešli 25% osnovnog kapitala lizing društva;

4. ako je lizing društvo dostavilo informacije koje su netačne ili nisu u skladu sa propisima FBA ili su odbili da dostave podatke koje je FBA tražila radi odlučivanja po zahtjevu.

#### Član 10.

Rješenje po zahtjevu za izdavanje saglasnosti iz člana 8. ove odluke, FBA će donijeti u roku od 30 dana od dana prijema potpunog zahtjeva.

#### Član 11.

(1) Lizing društvo je dužno obavjestiti FBA o sticanju vlasničkog interesa u drugom (postojećem ili novom) pravnom licu do 5% osnovnog kapitala lizing društva i dostaviti FBA upis u nadležni registar tog pravnog lica u roku od 15 dana od dana upisa.

(2) Lizing društvo je dužno FBA dostaviti ovjerenu fotokopiju upisa/izvoda kod nadležnih organa za pravno lice u kome je lizing društvo steklo vlasnički interes u roku od 15 dana od dana upisa/evidentiranja.

#### Član 12.

FBA će oduzeti izdatu saglasnost za sticanje (povećanje) vlasničkog interesa u drugom pravnom licu ako lizing društvo u roku od šest mjeseci od dana izdavanja saglasnosti ne stekne (ili ne poveća) poslovni udjel ili dionice u istom.

### IV. SAGLASNOST ZA OSNIVANJE PODRU@NICA

#### **1. Saglasnost lizing društvu sa sjedištem u Federaciji BiH za osnivanje podružnice u Federaciji BiH**

#### Član 13.

(1) Lizing društvo sa sjedištem u Federaciji BiH može obavljati poslove lizinga osnivanjem podružnica u Federaciji BiH.

(2) Uz zahtjev za osnivanje podružnice iz stava (1) ovog člana, lizing društvo FBA dostavlja:

1. odluku nadležnog organa upravljanja o osnivanju podružnice sa nazivom i adresom podružnice;
2. odluku nadležnog organa o imenovanju lica ovlašćenog za vođenje podružnice sa naznakom njegovih ovlaštenja, te dokazima o njegovoj stručnoj spremi, državljanstvu i radnom iskustvu;
3. poslovni i finansijski plan lizing društva koji uključuje projekciju poslovanja podružnice;
4. izjavu da će lizing društvo u novom organizacionom dijelu obezbijediti primjenu Programa, politika i procedura koje su sačinjene prema odredbama Odluke o minimalnim standardima aktivnosti lizing društava na sprečavanju pranja novca i finansiranja terorizma;
5. dokaz o obezbijeđenom poslovnom prostoru (dokaz o vlasništvu ili ugovor o zakupu sa dokazom da je zakupodavac vlasnik poslovnog prostora), te visinu eventualnih ulaganja u isti;
6. informatičku opremljenost i povezanost podružnice sa lizing društvom;
7. plan kadrova koji će u podružnici biti zaposleni (broj i kvalifikaciona struktura).

#### Član 14.

Rješenje po zahtjevu za izdavanje saglasnosti iz člana 13. ove odluke, FBA će donijeti u roku od 30 dana od dana prijema potpunog zahtjeva.

#### Član 15.

Lizing društvo je dužno FBA dostaviti ovjerenu fotokopiju upisa podružnice u nadležni registar, u roku od 15 dana od dana upisa.

## **2. Saglasnost lizing društvu sa sjedištem u Federaciji BiH za osnivanje podružnice u Republici Srpskoj ili Brčko Distriktu**

### Član 16.

(1) Lizing društvo sa sjedištem u Federaciji BiH može obavljati poslove lizinga osnivanjem podružnica u Republici Srpskoj ili Brčko Distriktu.

(2) Uz zahtjev za osnivanje podružnice iz stava (1) ovog člana, lizing društvo dostavlja FBA dokumentaciju iz člana 13., stav (2) ove odluke.

### Član 17.

Rješenje po zahtjevu za izdavanje saglasnosti iz člana 16, stav (2). ove odluke, FBA će donijeti u roku od 30 dana od dana prijema potpunog zahtjeva

### Član 18.

Lizing društvo je dužno da se u roku od 30 dana od dana izdavanja saglasnosti iz člana 17. ove odluke obrati regulatornoj instituciji Republike Srpske, odnosno Brčko Distrikta, zahtjevom za osnivanje podružnice, uz primjenu propisa Republike Srpske, odnosno Brčko Distrikta.

### Član 19.

Lizing društvo je dužno FBA dostaviti Rješenje o odobrenju osnivanja podružnice izdato od regulatorne institucije Republike Srpske, odnosno Distrikta Brčko kao i ovjerenu fotokopiju upisa podružnice u nadležni registar, u roku od 15 dana od dana odobrenja, odnosno upisa.

## **3. Saglasnost lizing društvu sa sjedištem u Republici Srpskoj i Brčko Distriktu za osnivanje podružnice u Federaciji BiH**

### Član 20.

Lizing društvo sa sjedištem u Republici Srpskoj i Brčko Distriktu može obavljati poslove lizinga osnivanjem podružnica u Federaciji BiH.

### Član 21.

Uz zahtjev za osnivanje podružnice iz člana 20. ove odluke, lizing društvo dostavlja FBA dokumentaciju iz člana 13., stav (2) ove odluke, te:

1. dozvolu za rad lizing društva koje osniva podružnicu izdatu od strane Agencije za bankarstvo Republike Srpske, odnosno nadležnog organa Brčko Distrikta;
2. saglasnost nadležnog organa Republike Srpske, odnosno Brčko Distrikta za osnivanje podružnice;
3. ovjerenu izjavu lizing društva za preuzimanje odgovornosti za sve obaveze koje će nastati u poslovanju podružnice.

### Član 22.

Rješenje po zahtjevu za izdavanje saglasnosti iz člana 21. ove odluke, FBA će donijeti u roku od 30 dana od dana prijema potpunog zahtjeva

### Član 23.

Lizing društvo je dužno FBA dostaviti ovjerenu fotokopiju upisa podružnice u nadležni registar u roku od 15 dana od dana upisa.

#### Član 24.

Za promjene u podružnicama (adresa sjedišta, lice ovlašteno za vođenje i dr.) FBA ne izdaje saglasnost, ali je lizing društvo dužno da o istim dostavi FBA obavijest radi ažuriranja evidencije FBA i ovjerenu fotokopiju izvršenih izmjena upisa u nadležnom registru, u roku od 15 dana od dana upisa.

#### 4. Odbijanje zahtjeva i oduzimanje izdate saglasnosti lizing društvu za osnivanje podružnice

#### Član 25.

FBA može odbiti zahtjev lizing društvu za izdavanje saglasnosti za osnivanje podružnice iz sljedećih razloga:

1. lošeg finansijskog stanja lizing društva;
2. ako je lizing društvu od strane FBA izdata mjera koja se odnosi na zabranu širenja organizacione mreže;
3. ako je lizing društvo dostavilo informacije koje su netačne ili nisu u skladu sa propisima FBA ili su odbili da dostave podatke koje je FBA tražila radi odlučivanja po zahtjevu.

#### Član 26.

FBA može oduzeti izdatu saglasnost za osnivanje podružnice lizing društvu ako podružnica u roku od šest mjeseci od dana izdavanja saglasnosti ne počne sa radom ili iz drugih razloga utvrđenih kontrolom.

#### V. SAGLASNOST ZA IZBOR VANJSKOG REVIZORA

#### Član 27.

Lizing društvo dužno je pribaviti prethodnu saglasnost FBA za imenovanje vanjskog revizora koji će izvršiti reviziju godišnjih finansijskih izvještaja i sačiniti revizorski izvještaj u skladu sa propisima kojima se uređuje oblast računovodstva i revizije, uključujući i ocjenu usklađenosti sa Zakonom o sprječavanju pranja novca i finansiranja terorizma.

#### Član 28.

Lizing društvo uz zahtjev za izdavanje prethodne saglasnosti za izbor vanjskog revizora, FBA dostavlja:

1. nacrt akta kojim se ugovara izrada revizorskog izvještaja u formi nacrta ugovora ili pisma namjere;
2. upis (registraciju) vanjskog revizora kod nadležnog registra;
3. izjavu da vanjski revizor za kojeg se traži saglasnost nije uzastopno obavljao četiri revizije lizing društva.

#### Član 29.

Rješenje po zahtjevu za izdavanje saglasnosti iz člana 27. ove odluke, FBA će donijeti u roku od 30 dana od dana prijema potpunog zahtjeva.

#### Član 30.

Nadležni organ upravljanja u lizing društvu donosi Odluku o izboru nezavisnog vanjskog revizora po dostavljanju lizing društvu odobrenja iz člana 29. ove odluke, a potom sa izabranim revizorom potpisuje Ugovor o izradi revizorskog Izvještaja.

#### Član 31.

(1) Lizing društvo je dužno FBA dostaviti usvojenu Odluku o izboru vanjskog revizora, te potpisani Ugovor sa izabranim vanjskim revizorom u roku od 10 dana od dana usvajanja, odnosno potpisivanja.

(2) Lizing društvo je dužno FBA dostaviti revidirani godišnji finansijski izvještaj u zakonskom roku i objaviti ga u skraćenom obliku u jednom od dnevnih novina na teritoriji Bosne i Hercegovine i o tome, uz dostavu kopije objave, obavijestiti FBA.

## VI. ZAVRŠNE ODREDBE

### Član 32.

U slučaju suprotnosti neke odredbe ove odluke sa odredbama naknadno donesenog zakona ili drugog propisa, do izmjene ove odluke neposredno će se primjenjivati odgovarajuća odredba zakona ili drugog propisa.

### Član 33.

Ova odluka stupa na snagu osmog dana od dana objavljivanja u "Službenim novinama Federacije BiH".

---

Broj U.O. - 13- 4/09  
24. juna 2009. godine  
Sarajevo

---

Predsjednik  
Upravnog odbora  
Mr. sc. **Haris Ihtijarević**, s. r.

---